

Jahresbericht 2023 Aktive

Es Turnerjahr ir Aktivriege im Schnäudurchlouf: Mir starte jewius miteme gmüetleche erste Quartau ir Turnhaue. Es Highlight vo üs Leiterinne isch, wenn üsi Turnerinne Teile vode Trainings säuber gstaute – so chöme immer widr nöi und cooli Idee zäme.

Nach de Früehligsferie stö d Turnfestvorbereitige a. Derbi trainiere mir üsi 3 Diszipline. Dises Johr si d Pändustafette, dr Wurf und dr Chorbbau Fachtescht ufem Programm gstange. Üses Chönne heimer de im Juni am seeländische Turnfescht in Pieterlen unger Bewiis gsteut. E bsungrigi Herusforderig isch gsi, dass mir nume mit 6 Turnerinne gstartet si und somit aui Teilnähmerinne jedi Disziplin hei müesse mache. Üse persönelle Erfoug isch eidütig di ersti Disziplin im Chorbbau Fachtescht gsi, womer üs Notene bis zumne 9.16 erspiut hei. Das muess ade zwe Chugle Glace gläge ha womer churz vorhär no verdrückt hei. Üses Ziu nid Letscht z wärde, heimer de schlussändlech mitem 23. Rang erreicht.

Nachem Turnfescht nämemers jewius chli gmüetlecher und chöme aui für üses Abschlussbrätile im Waudhuus Worbe zäme. Dises Johr si mir Aktive verantwortlech gsi für Spiel und Spass. Vor Pantomime übers Lillifée Memorie bis zum Schoggikuss Wettässe – es isch für aui öppis derbi gsi.

Nach der länge Summerpouse heimer no chli z warme Wätter gnosse, öppe binere Partie «Kubb» oder bimene Velotüürli uf Orpund. Es bsungrigs Highlight isch immer d Wanderig mit aune zäme – dises Johr isches is Bärner Oberland gange. Nacheme meh oder weniger asträngende Ufstieg (chunnt drufa wän me frogt) simer mitere schöne Ussicht und ere Trottfahrt belohnt worde.

Z letschte Quartau isch de widr ganz üsem Soirée gwidmet. Ungerem Thema «Moulin Rouge» simer i üsne Can-can Röckli und Netzstümpf über d Bühni dänzlet. Zuesätzlech heimer zum Motto «Jailhouse Rock» ou no dörfe mitem TV ufträtte.

Bevor mer mit aune zäme zur Wiehnachtsfiir si zäme cho, simer no uf Biu go schlöfle und hei bimene Glühwii oder Punsch uf üses Johr aber vorauem o uf üses coole Aktive-Grüppli agstosse. Dr traditionell Johresabschluss heimer dises Mou in Stude ir Wyde gfiiret. Nachem feine Rahmschnitzu heimer no aui zäme Wiehnachtslieder gsunge - sogar inkl. musikalischer Begleitig vo üsem Special guest, em Manuel. Was natürlech ou nid darf fähle isch d Uflösig und Nöiiziehg vo üsem Wichteleg, wo dürs ganze Johr für schöni Überraschige und Gschänkli sorgt.

Es grosses Merci a üsi Turnerinne für öii Motivation, öii Idee und öiie Isatz i däm Johr - mir fröie üs ufs 2024 mit euch!

Öii Leiterinne: Mia, Tanja und Ramona